

AENEIDOS XI

bis Tusci Rutulos egere ad moenia uersos,  
bis reiecti armis respectant terga tegentes. 630

tertia sed postquam congressi in proelia totas  
implicuere inter se acies legitque uirum uir,  
tum uero et gemitus morientum et sanguine in alto  
armaque corporaque et permixti caede uirorum  
semianimes uoluuntur equi, pugna aspera surgit. 635

Orsilochus Remuli, quando ipsum horrebat adire,  
hastam intorsit equo ferrumque sub aure reliquit;  
quo sonipes ictu furit arduus altaque iactat  
uulneris impatiens arrecto pectore crura,  
uoluitur ille excussus humi. Catillus Iollan 640

ingentemque animis, ingentem corpore et armis  
deicit Herminium, nudo cui uertice fulua  
caesaries nudique umeri nec uulnera terrent;  
tantus in arma patet. latos huic hasta per armos  
acta tremit duplicatque uirum transfixa dolore. 645

funditur ater ubique cruor; dant funera ferro  
certantes pulchramque petunt per uulnera mortem.

At medias inter caedes exsultat Amazon  
unum exserta latus pugnae, pharetrata Camilla,  
et nunc lenta manu spargens hastilia denset, 650  
nunc ualidam dextra rapit indefessa bipennem;  
aureus ex umero sonat arcus et arma Dianae.

illa etiam, si quando in tergum pulsa recessit,  
spicula conuerso fugientia derigit arcu.  
at circum lectae comites, Larinaque uirgo 655

Tullaque et aeratam quatiens Tarpeia securim,  
Italides, quas ipsa decus sibi dia Camilla  
delegit pacisque bonas bellique ministras: